

## La bodega

Un còp èra, un pastre que fasiá petar la bodega.  
Un vèspre, se'n anèt pausar a la broa de la ribièra.  
Coma èra a agachar lo lugar, vegèt pas son instrument lisar  
e s'arrestar contra una pèira.

Atirada per la musica una fadeta pichoneta apareguèt.  
Tre lo pastre endormit, se sarrèt de la bodega.  
Qu'es aquò ? I a qualqu'un ?  
Coma degun respondèt pas, se placèt dins l'instrument.

« Nau , nau, nau ! » , una granhòta sautèt sus la pèira.

- Qu'es aquò ? I a qualqu'un ?

- Òc, soi soleta. Dintra.

E la granhòta i bombiguèt dedins.

« I anam ! I anam ! I anam ! » un ase pichon venguèt beure a la ribièra.

- Qu'es aquò ? I a qualqu'un ?

- Òc, sèm doas, la fadeta e la granhòta. Dintra.

L'ase i dintrèt tanben.

« Ooo ! Ooo ! Ooo ! » un lop sortiguèt.

- Qu'es aquò ? I a qualqu'un ?

- Òc, sèm tres, la fadeta, la granhòta e l'ase.

- Butatz-vos o vos mangi !

- Ane ! Ane ! D'acòrdi ! Ensaja de dintrar.

E vaquí que lo lop trauquèt.

« Í í í » una masca aterriguèt sus la bodega.

- Qu'es aquò ? I a qualqu'un ?

- Òc, sèm quatre, la fadeta, la granhòta, l'ase e lo lop.

- Daissatz-me una plaça o vos càmbii en posca !

- A ! Que de non ! Sarrem-nos ! E dintra !

La masca s'enfonilhèt dins la bodega.

« Pin ! Pom ! » Vaquí lo Drac.

- Qu'es aquò ? I a qualqu'un ?

- Òc, sèm cinc, la fadeta, la granhòta, l'ase, lo lop e la masca.

- Daissatz-me una plaça o vos cabussi dins lo gòrg !

- D'acòrdi, d'acòrdi, cachem-nos encara ! E dintra !

Lo Drac s'engulhèt.

« Cr, cr, cr » una formiga s'arrestèt.

- Qu'es aquò ? I a qualqu'un ?

- Òc, sèm sièis, la fadeta, la granhòta, l'ase, lo lop, la masca e lo Drac.

- Siás tan pichoneta que trobaràs ben una placeta !

E la formiguèta s'i rabalèt.

Subit, lo pastre se desrevelhèt e vegèt que sa bodega èra pas pus aquí. L'apercebèt prèp de l'aiga. Èra venguda grandarassa.  
Sofriguèt de la prene, alenèt e bufèt.  
S'ausiguèt de crits.....

Lo pastre vegèt sortir la formiga, lo Drac, la masca, lo lop, l'ase, la granhòta e la fadeta.  
- Ajatz pas paur, diguèt. Venètz dançar !

Lo pastre sansonhèt la bodega e sos sèt amics novèls dancèron fins a l'albeta.  
E d'aquel jorn a l'endavant, lo son de la bodega recampa totas las bèstias dels alentorns.

Cric ! crac ! Mon conte es acabat.